

LUV

Luv, Zaj 1

Luv thiab Nos Es Mis. 1 : 1 - 22.

1 1 Lub caij uas cov Txwj Laus Tiv
Thaiv kav teb chaws, lub teb chaws
tau tshaib plab ib ntus. Thaum ntawd
muaj ib tug txiv neej nyob Npes Les Hes,
nws coj nws poj niam thiab nws ob tug
tub lawv tsiv mus nyob nram cov nras tiaj
Muas. 2 Tus txiv neej ntawd hu ua Es
Lis Mes Les, nws tus poj niam hu ua Nos
Es Mis thiab nws ob tug tub ib tug hu ua
Mas Loos, ib tug hu ua Kis Lis Yoos.
Lawv yog ib co Es Fas Tas, nyob Npes
Les Hes, Yus Das teb. Lawv tuaj txog
cov tiaj Muas, lawv tsa tsev nyob ntawd.
3 Es Lis Mes Les uas yog Nos Es Mis tus
txiv, tuag nyob ntawd. Tshuav Nos Es
Mis nrog nws ob tug tub nyob xwb.
4 Ob tug tub ntawd yuav poj niam nyob
hauv cov Muas. Ob tug poj niam ntawd
ib tug hu ua Os Pas, ib tug hu ua Luv.
Lawv nyob ntawd tau kaum tawm xyoo.
5 Ces Mas Loos thiab Kis Lis Yoos
nkawd kuj tuag. Tshuav Nos Es Mis ib
leeg xwb nws tsis muaj tub muaj txiv
lawm.
6 Nos Es Mis thiaj npaj nrog nws ob tug
nyab yuav rov los rau Yus Das teb. Nws
hnov tias Tswv Ntuj tuaj xyuas nws haiv
neeg thiab pub mov rau lawv noj lawm.
7 Ces Nos Es Mis thiab nws ob tug nyab
yuav tso lub teb chaws lawv nyob txawm
tseg, lawv sawv kev yuav rov los rau teb
chaws Yus Das.
8 Nos Es Mis hais rau nws ob tug nyab
tias :
"Neb mus mog ! Neb rov mus nrog neb
niam neb txiv nyob. Kuv thov kom
HUAB TAIS hlub neb xws li neb tau

hlub cov uas tuag lawd thiab tau hlub
kuv. 9 Thov kom HUAB TAIS pub rau
neb ob leeg tib si kom neb nrhiav tau ib
lub neej kaj lug nrog ib tug txiv nyob."
Ces Nos Es Mis puag nkaus nws ob tug
nyab, nws nwj nkawd, tab sis nkawd quaj
quaj.
10 Nkawd hais rau nws tias :
"Wb nrog koj mus ua koj haiv neeg."
11 Nos Es Mis teb tias :
"Neb rov mus tsev mog, ob tug me
ntxhais ! Neb yuav nrog kuv mus ua dab
tsi ? Kuv twb tsis muaj ib tug tub yuav
los qaws neb ua neej lawm. 12 Neb cia
li rov mus mog ! Kuv laus laus lawm, kuv
tsis xav rov yuav txiv. Tab txawm hais
tias hmo no kuv yuav tau ib tug txiv thiab
kuv yuav xeeb tub no, los neb puas yuav
tos tau kom lawv hlob ?
13 Yog neb ua li ntawd mas ntshai yog
neb tsis xav yuav txiv ntxiv xwb. Neb
tsis txhob ua li ntawd mog ! Yog neb ua
li ntawd mas kuv yuav tu siab. Kuv yuav
xav tias HUAB TAIS pub hmoov tsis zoo
rau kuv."
14 Ob tug nyab rov qab quaj quaj dua,
ces Os Pas nwj nws niam pog, nws ua ib
siab rov mus nrog nws neej nws tsav
nyob lawm.
Tshuav Luv nrog Nos Es Mis nyob, nws
tsis tso Nos Es Mis tseg li.
15 Nos Es Mis hais rau Luv tias :
"Koj saib Os Pas twb rov mus hauv nws
haiv neeg thiab nws cov dab lawm. Koj
ua li nws thiab koj rov mus mog !"
16 Luv teb tias :
"Koj tsis txhob ntiab kuv kom kuv tso koj
tseg mas ! Koj mus qhov twg, kuv yuav
nrog koj mus. Koj nyob qhov twg, kuv

yuav nrog koj nyob. Koj haiv neeg yuav yog kuv haiv neeg. Koj tus Tswv Ntuj yuav yog kuv tus Tswv Ntuj. 17 Koj tuag qhov twg kuv xav tuag qhov ntawd. Koj ntxa nyob qhov twg, kuv ntxa yuav nyob ntawd thiab. Yog kuv tsis tuag nyob qhov chaw koj tuag mas kuv thov kom HUAB TAIS muab txoj hmoov phem rau kuv !"

18 Nos Es Mis pheej pom Luv nrog nws nraim, nws tsis hais dab tsi rau Luv ntxiv.

19 Ces nkawd ob leeg tsiv mus txog Npes Les Hes. Nkawd mus txog, lub moo ncha tas lub teb chaws. Cov poj niam hauv nruab zog tuaj hais zom zaws tias :

"Koj puas yog Nos Es Mis tiag ?"

20 Nos Es Mis teb lawv tias :

"Nej tsis txhob hu kuv ua Nos Es Mis ntxiv. Nej hu kuv ua 'Niam Pog Iab', vim Sas Dais muab kev lwi siab rau kuv xwb !

21 Thaum kuv mus, kuv puv siab. HUAB TAIS coj kuv rov los qhuav nquas. Nej puas tseem yuav hu tau kuv ua Nos Es Mis ? Vim HUAB TAIS tsis nrog kuv. Sas Dais muab kev txom nyem rau kuv."

22 Nos Es Mis coj nws tus nyab ntawm Muas rov los. Nkawd los txog Npes Les Hes, twb yog lub caij pib sau nplej lawm.

Luv mus tom Npuag Oos cov teb.

2 : 1 - 23.

2 1 Nos Es Mis tshuav nws tus txiv ib tug kwv tij txhee. Yog ib tug neeg nyob chaw siab hauj sim. Nws yog Es Lis Mes Les xeem. Nws hu ua Npuag Oos.

2 Luv hais rau Nos Es Mis tias :

"Thov koj kheev kuv mus nkawg ntxaib nplej nyob hauv lawv tej teb. Kuv mus hais. Yog leej twg kheev ces kuv mus

khaws tom nws qub qab."

Nos Es Mis teb tias :

"Me ntxhais, koj mus kuj tau."

3 Luv thiaj mus. Nws mus ncaj rau hauv Npuag Oos daim teb.

4 Npuag Oos nyuam qhuav los Npes Les Hes los txog ntua. Nws hais rau cov sau nplej tias HUAB TAIS nrog nej nyob !

5 Npuag Oos nug tus tub txib saib cov neeg sau nplej tias :

"Tus poj niam hluas hluas ntawd yog leej twg tus ?"

6 Tus tub txib saib cov neeg sau nplej teb tias :

"Tus poj niam hluas hluas yog ib tug poj niam Muas, uas nws nrog Nos Es Mis los ntawm cov tiaj Muas los.

7 Nws tuaj hais rau kuv tias 'Kuv tuaj khaws cov hnab nplej poob nram neb qub qab puas tau ?' Ces tag kis no sawv ntxov ntxov nws yeej tuaj nyob ib hnub ntawm no."

8 Npuag Oos hais rau Luv tias :

"Me ntxhais, koj tsis txhob mus khaws nplej nyob hauv lwm daim teb mog ! Koj tsis txhob khiav, koj raws nraim kuv cov tub txib qab.

9 Koj ntsia ntsoov lawv hlais nplej nyob qhov twg ces koj raws nraim lawv qab. Kuv txwv tsis kheev lawv ua phem rau koj. Yog koj nqhis dej mas koj mus hliv hauv cov plhuaj taub lawv ce tau lawm los haus."

10 Ces Luv khoov ti av pe Npuag Oos tias :

"Vim li cas koj thiaj ua zoo rau kuv ? Kuv yog ib tug pej kum neeg xwb !"

11 Npuag Oos teb tias :

"Vim kuv tau hnov luag tej hais txog koj rau kuv. Lawv piav tej koj tau ua rau koj niam pog thaum koj tus txiv tuag lawm. Koj tso koj niam koj txiv vaj tsev tseg thiab koj tuaj nyob ib lub teb chaws uas

koj tsis tau paub dua li. 12 Thov kom HUAB TAIS pub rau koj raws li koj tau ua ! Thov kom His Xas Lais tus Tswv Ntuj uas koj los nkaum hauv nws qab tis pub paj tshab ntawd rau koj."

13 Luv hais tias :

"Txiv hlob, thov koj ua zoo rau kuv mus li mog ! Koj hais lus zoo rau koj tus ntxhais txib mas kuv tso siab vim kuv twb tsis txij koj ib tug ntxhais txib."

14 Thaum txog caij noj su, Npuag Oos hais rau Luv tias :

"Koj cia li los ntawm no, los noj cov mov thiab cov zaub no ntxuag.

Ces Luv los zaum nrog cov neeg sau nplej noj mov, thiab Npuag Oos tseem kib ib taig noob rau nws noj. Thaum Luv noj tas tseem seem ib co. 15 Ces Luv sawv mus khaws nplej. Npuag Oos hais rau nws cov tub txib tias :

"Nej cia nws khaws tej uas hlauv ntawm tes nplej los huv si, nej tsis txhob cem nws. 16 Thiab nej tseem yuav txhob txwm rho ob peb hnab nplej ntawm nej cov tes nplej tso poob rau hauv av kom nws tau khaws. Nej yuav tsis txhob ntthe lawv nws qab."

17 Luv khaws nplej txog tsaus ntuj. Thaum Luv ntaus nws cov nplej, kww yees nws ntaus tau ib tawb. 18 Ces Luv nqa cov nplej ntawd nws rov mus hauv lub nroog. Nws muab cov nplej nws khaws tau rau nws niam saib thiab muab qhov nws noj tsis tas thaum tav su rau nws niam. 19 Nws niam hais tias :

"Hnub no koj mus khaws nplej qhov twg ? Thov kom Ntuj foom hmoov zoo rau tus uas nws ua zoo rau koj !"

Luv qhia nws niam tias nws ua hauj lwm nyob hauv leej twg daim teb, nws hais tias :

"Hnub no kuv ua hauj lwm nyob hauv ib

tug txiv neej hu ua Npuag Oos daim teb."

20 Ces Nos Es Mis hais rau nws tus nyab tias :

Thov kom HUAB TAIS foom lus zoo rau nws. HUAB TAIS hhub cov tseem nyob thiab cov tuag lawm ! Tus ntawd yog peb ib tug kwv tij. Yog ib tug muaj cai cawm peb."

21 Luv hais rau nws niam tias :

"Nws tseem hais rau kuv tias : Koj tuaj nrog kuv cov tub txib ua hauj lwm mus txog thaum lawv sau kuv cov nplej tas tso."

22 Nos Es Mis hais rau nws tus nyab tias :

"Me ntxhais, zoo kawg ! Koj mus nrog nws cov tub txib mog, koj thiaj li tsis tau mus nrhiav dua lwm daim teb uas ntshai lawv yuav tsis txais koj zoo."

23 Ces Luv niaj hnub mus nrog Npuag Oos cov tub txib muab nplej mus txog lub caij lawv muab nplej tas. Thiab nws nrog Nos Es Mis nyob.

Npuag Oos tsaug zog. 3 : 1 - 18.

3 1 Nos Es Mis hais rau Luv tias :

"Me ntxhais, kuv yuav tsum nrhiav tus yuav los tsa koj lub neej kom koj tau zoo. 2 Npuag Oos yog peb ib tug kwv tij. Koj tau nrog nws cov tub txib khaws nplej tau ntev los. Hmo no, tej zaus nws yuav nyob yaj nplej tom tshav ntaus nplej. 3 Koj ntxuav cev thiab koj pleev tshuaj tsw qab. Koj hloov khaub ncaws, koj mus lawm nram nws daim teb. Tab sis koj txhob xub ua nws paub tias koj tuaj. Koj cia nws noj hmo tas tso.

4 Thaum nws mus pw, koj cim ntsoov nws qhov chaw pw. Ces koj mus pw nyob ntawd. Koj yuav pom muaj ib qho chaw nyob nram nws ko taw txaj. Koj mus pw nyob ntawd. Ces nws yuav nug

koj tias koj xav ua dab tsi.

5 Koj yuav teb tias : Kuv yuav ua tas huv si raws li koj qhia !

6 Ces Luv mus nram tshav ntaus nplej, nws ua tau tib si raws li nws niam qhia.

7 Npuag Oos noj mov haus dej tas, nws luag nyav mus pw nyob ntawm pawg nplej. Ces Luv maj mam txav mus. Nws pom muaj ib qho chaw nyob ntawm Npuag Oos ko taw, nws mus pw nyob ntawd. 8 Thaum ib tag hmo, Npuag Oos hnov no, nws tsim dheev los. Nws ntsia ncig lees, nws pom ib tug poj niam pw ntawm nws ko taw. 9 Nws nug tias :

"Koj yog leej twg ?"

Luv teb tias :

"Kuv yog Luv, koj tus ntxhais txib. Thov koj muab koj lub tsho rau kuv vov, vim koj muaj cai cawm kuv."

10 Npuag Oos teb tias :

"HUAB TAIS foom hmoov rau koj, me ntxhais ! Koj txoj hauj lwm hwm niam hwm txiv no loj kawg, loj tshaj thawj zaug. Koj tsis nrhiav ib tug neeg hluas, ib lub neej muaj los pluag. 11 Koj tsis txhob txhawj mog ! Koj thov dab tsi mas kuv yuav muab dab tsi rau koj. Tas cov neeg nyob hauv Npes Les Hes no paub tias koj yog ib tug poj niam tsim txiaj. 12 Kuv muaj cai tiag. Tab sis tseem tshuav ib tug kwv tij txheeb dua kuv. 13 Koj pw qhov no mog. Cia tag kis tso. Yog nws xav cawm koj, mas zoo kawg. Yog nws tsis xav mas kuv yuav cawm koj. Koj pw ib hmos ntawm no txog kaj ntug tso."

14 Ces Luv pw ntawm Npuag Oos taw ib hmos. Tag kis kaj ntug, Npuag Oos sawv ntxov ntxov thaum tseem zeem tsis tau neeg. Vim nws xav tias yuav tsis txhob pub leej twg paub tias tus poj niam ntawd tuaj pw hauv nws lub tshav ntaus nplej.

15 Npuag Oos hais rau Luv tias :

"Koj cug koj lub tsho uas koj hnay thiab koj tuav zoo zoo."

Luv cug Luv lub tsho, ces Npuag Oos hliv rau tais nplej rau hauv. Nws tsaws rau Luv ris. Ces Luv rov los hauv nroog lawm. 16 Thaum Luv los txog tsev, nws niam hais rau nws tias :

"Me ntxhais ! Koj nyob li cas lawm ?"

Luv piav qhia nws niam txog tej Npuag Oos hais rau nws huv si.

17 Thiab Luv tseem hais ntxiv tias :

"Cov nplej no nws muab rau kuv, nws hais tias : koj tsis txhob mus tsev tes qhuav nquas."

18 Nos Es Mis hais rau Luv tias :

"Me ntxhais, koj nyob twj ywm tos saib yuav muaj li cas mog ! Tus neeg ntawd yeej yuav tsis tso tseg, yog nws hais tsis tiav hnub no."

Npuag Oos thiab Luv sib qaws ua neej. 4 : 1 - 17.

4 1 Npuag Oos mus pem nroog, nws mus zaum ntawm qhov rooj. Tus kwv tij uas Npuag Oos hais txawm hla ze ntawd. Npuag Oos hu nws tias :

"Koj los ntawm no, koj los zaum."

Ces nws los zaum ntawd. 2 Npuag Oos xaiv kaum leej txwj laus nyob hauv nroog, nws hais rau lawv tias :

"Nej zaum ntawm no."

Ces lawv zaum. 3 Npuag Oos hais rau tus kwv tij muaj cai cawm tias :

"Daim teb uas yog peb tus kwv tij Es Lis Mes Les daim, mas nyem no Nos Es Mis rov ntawm cov tiaj Muas los txog, nws xav muab muag no. 4 Kuv xav tias yuav tsum hais rau koj tus txheeb ze heev paub. Yog koj yuav, mas cov uas zaum ntawm no thiab cov txwj laus yuav ua tim khawv. Yog koj xav cawm nws mas koj cawm. Yog koj tsis yuav mas koj hais

rau kuv paub. Vim tias koj yog thawj tug muaj cai cawm. Kuv tsuas lawv koj qab xwb."

Ces tus neeg ntawd teb tias :

"Yuav cawm los kuj cawm thiab."

5 Npuag Oos hais ntxiv tias :

"Yog hnub twg koj txais daim teb ntawd ntawm Nos Es Mis lawm, mas koj kujyuav tsum txais Luv uas yog tus ntxhais Muas. Nws yog peb tus kww tij tuag lawmtus poj niam, kom xww peb tus kww tij lubnpe tsis txhob ploj nyob hauv nws tsevneeg."

6 Tus muaj cai cawm teb tias :

"Yog li mas kuv yuav cawm tsis tau, rauqhov kuv ntshai tsam tsis zoo rau kuv lubcuab tam. Ces cia koj cawm vim kuv cawm tsis tau."

7 Thaum ub, His Xas Lais txoj cai qhiatias thaum yuav sib hloov li ntawd mas obtug neeg ntawd, ib tug hle nws txhais khau ntxig rau lwm tus. Nkawd ua li ntawd nyob ntawm cov tim khawv xubntiag.

8 Tus muaj cai cawm thiaj hle nws txhais khau rau Npuag Oos, thiab hais tias :

"Koj cawm nws rau koj yuav."

9 Npuag Oos hais rau cov txwj laus thiabtsoom sid tias :

"Hnub no, nej ua tim khawv tias kuv txais Es Lis Mes Les lub cuab tam thiab Kis Lis Yoos thiab Mas Loos nkawd lub cuab tam ntawm Nos Es Mis txhais tes.

10 Thiab nej ua tim khawv tias kuv txais Luv uas yog Mas Loos tus poj niam los ua kuv poj niam kom xww tus uas tau tas sim neej lub npe tsis txhob ploj nyob hauv nws cov kww tij thiab nyob hauv

nws lub teb chaws. Hnub no, nej sawvdaws nrog kuv ua tim khawv li ntawd."

11 Tas tsoom sid nyob ntawm qhov roojteb tias :

"Peb ua tim khawv."

Cov txwj laus teb tias :

"Thov kom HUAB TAIS pub rau tus poj niam yuav los hauv koj tsev, kom nws zoo li Las Ses thiab Les As nkawd. Yog nkawd tsa His Xas Lais lub tsev. 12 Koj muaj hwj chim nyob hauv Es Pos Tas. Koj lub npe yuav nto moo nyob hauv Npes Les Hes. Thov kom cov xeeb ntxwv uas HUAB TAIS yuav pub rau koj ua koj tsev neeg xws li Pes Les tsev neeg, Pes Les uas Tas Mas yug rau Yus Das."

13 Ces Npuag Oos yuav Luv los ua nws poj niam. Thaum nkawd tau los nyob ua ke lawm, HUAB TAIS pub kom Luv xeeb tub, ces Luv yug tau ib tug tub.

14 Cov poj niam tuaj hais rau Nos Es Mis tias :

"HUAB TAIS lub siab zoo ! Nws pub kom hnub no ib tug txheeb ze ua kom koj tus tub uas tas sim neej lawm lub npe tsis txhob ploj nyob hauv haiv His Xas Lais. 15 Nws yuav nplij koj thiab yuav yug koj thaum koj laus. Nws niam yog koj tus nyab uas hlub koj tshaj xya leej tub."

16 Ces Nos Es Mis puag nkaus tus me nyuam rau hauv nws xub ntiag. Thiab yog nws tu tus me nyuam kom hlob.

17 Cov poj niam tis npe rau tus me nyuam. Lawv hais tias :

"Ib tug tub yug los rau Nos Es Mis lawm."

Ces lawv tis npe rau tus me nyuam hu ua Os Npes. Os Npes yog Yes Xes txiv, ces Yes Xes yog Das Vis txiv.